



NEGERI PAHANG

TAMBAHAN PERUNDANGAN

AKTA KERAJAAN TEMPATAN 1976

Phg. P.U. 3/2000

UNDANG-UNDANG KECIL IKLAN, (MAJLIS DAERAH PEKAN) 2000

Tarikh Penyiaran:

13 Februari 2000

Tarikh mula berkuatkuasa:

13 Februari 2000

SUSUNAN UNDANG-UNDANG KECIL

Mukadimah

- Undang-Undang Kecil 1. Nama dan pemakaian.
- Undang-Undang Kecil 2. Tafsiran.
- Undang-Undang Kecil 3. Bahasa iklan.
- Undang-Undang Kecil 4. Penggunaan perkataan "Halal".
- Undang-Undang Kecil 5. Perlesenan iklan-iklan.
- Undang-Undang Kecil 6. Permohonan bagi mendapatkan lesen.
- Undang-Undang Kecil 7. Pengeluaran lesen.
- Undang-Undang Kecil 8. Pembaharuan lesen.
- Undang-Undang Kecil 9. Fi lesen.
- Undang-Undang Kecil 10. Fi lesen hendaklah dibayar balik jika lesen tidak dikeluarkan
- Undang-Undang Kecil 11. Pembatalan lesen.
- Undang-Undang Kecil 12. Pembayaran balik deposit.
- Undang-Undang Kecil 13. Kawasan-kawasan untuk iklan.
- Undang-Undang Kecil 14. Pengecualian daripada lesen.
- Undang-Undang Kecil 15. Ketinggian dan unjuran iklan dsb.
- Undang-Undang Kecil 16. Keselamatan struktur iklan.
- Undang-Undang Kecil 17. Penyenggaraan.
- Undang-Undang Kecil 18. Menurunkan iklan.
- Undang-Undang Kecil 19. Penalti.
- Undang-Undang Kecil 20. Anggapan.
- Undang-Undang Kecil 21. Pemohon-pemohon lesen bertanggungjawab atas kegagalan.
- Undang-Undang Kecil 22. Kerosakan.
- Undang-Undang Kecil 23. Pengecualian.
- Undang-Undang Kecil 24. Kompaun.

JADUAL

Mukadimah

PADA menjalankan kuasa yang diberikan oleh seksyen 102 Akta Kerajaan Tempatan 1976 [Akta 171], Majlis Daerah Pekan membuat, dan menurut seksyen 103 Akta itu Pihak Berkuasa Negeri mengesahkan, undang-undang kecil berikut:

1. Nama dan pemakaian.

(1) Undang-undang kecil ini bolehlah dinamakan **Undang-Undang Kecil Iklan (Majlis Daerah Pekan) 2000**.

(2) Undang-Undang Kecil ini hanya terpakai bagi kawasan Majlis Daerah Pekan.

2. Tafsiran.

Dalam Undang-Undang Kecil ini, melainkan jika konteksnya menghendaki makna yang lain-

“arkitek berdaftar” ertinya seseorang yang didaftar sebagai sedemikian di bawah Akta Arkitek 1967 [Akta 117];

“fi lesen” ertinya fi lesen yang kena dibayar di bawah undang-undang kecil 9 dan seperti yang ditetapkan di dalam Jadual Pertama;

“iklan” ertinya apa-apa pemberitahuan, pengumuman atau penerbitan yang dipamerkan, ditunjukkan atau didirikan bagi maksud memberitahu orang ramai mengenai apa-apa barang, keluaran, pengeluaran, tred, perniagaan, profesion, firma, perbadanan, organisasi, institusi, tempat, premis, peristiwa, aktiviti, atau apa-apa perkara atau maklumat lain, di atas apa-apa papan dendeng, papan, bumbung, dinding, pagar berpancang, pagar, pokok, rangka, plat, kain, rintangan, tiang, tonggak, dawai, salutan atau mana-mana bahagiannya di atas atau di dalam mana-mana bangunan, jalan atau tempat peranginan awam atau tempat tumpuan awam atau di atas mana-mana tanah dan termasuklah tanda langit, poster, tanda arahan dan papan tanda tetapi tidaklah termasuk suatu iklan pilihanraya;

“iklan bercahaya” ertinya mana-mana iklan yang disinari daripada lampu struktur atau rangka iklan itu sendiri dengan lampu elektrik seperti lampu bebola, lampu kalimantang, lampu neon tetapi tidak termasuk lampu tumpu atau apa-apa alat yang berada di luar struktur atau rangka iklan itu yang mengeluarkan cahaya pancaran ke atas iklan yang akan menghasilkan iklan itu dilihat dengan terang pada waktu malam;

“iklan tidak bercahaya” ertinya sesuatu iklan yang selain daripada iklan yang bercahaya;

“iklan pilihanraya” mempunyai makna yang sama seperti dalam Undang-Undang Kecil Iklan Pilihanraya (Majlis Daerah Pekan) 1990 [Phg. P.U. 10/90];

“jurutera awam berdaftar” atau “jurutera struktur berdaftar” ertinya orang yang didaftarkan sebagai sedemikian di bawah Akta Pendaftaran Jurutera 1967 [Akta 138];

“lesen” ertinya lesen untuk mempamerkan iklan yang dikeluarkan di bawah undang-undang kecil 17;

“Majlis” ertinya Majlis Daerah Pekan;

“papan tanda” ertinya mana-mana papan yang menunjukkan nama atau cap dagangan berdaftar mana-mana orang, firma, perbadanan atau pertubuhan atau jenis tred, perniagaan atau profession yang dijalankan oleh orang, firma, perbadanan atau pertubuhan itu;

“pegawai lesen” ertinya Yang Dipertua atau Setiausaha atau mana-mana pegawai yang diberi kuasa secara bertulis untuk mengeluarkan lesen oleh Majlis;

“pemegang lesen” ertinya orang yang kepadanya dikeluarkan lesen di bawah undang-undang kecil ini;

“poster” ertinya iklan yang bukan dari jenis iklan perdagangan yang kekal dan berukuran tidak lebih dari 60 sentimeter kali 90 sentimeter;

“tanda arahan” ertinya mempamerkan dengan apa-apa cara akan cap dagangan berdaftar atau jenis tred, perniagaan atau profesion mana-mana orang, firma, perbadanan atau pertubuhan dan dimaksudkan untuk menunjukkan jalan ke premis di mana papan tanda tidak dapat dilihat dari jalan;

“tiang poster” ertinya tiang yang disediakan oleh Majlis untuk pertunjukkan poster-poster;

“tanda langit” ertinya apa-apa binaan yang terdiri daripada suatu bingkai, papan dendeng, papan, bar, pilar, tiang, dawai atau sesuatu gabungan daripada benda-benda itu, atau apa-apa binaan yang serupa itu, atau apa-apa benda boleh dilihat terapung atau yang ditetapkan kedudukannya dengan ikatan dawai atau dengan lain-lain alat yang boleh dilenturkan, yang ditunjukkan bagi maksud iklan perdagangan atau profesion dalam sesuatu kedudukan supaya boleh mudah dilihat berlatarkan langit dari mana-mana lebuah atau tempat awam;

“Yang Dipertua” ertinya orang yang pada masa itu menjalankan kewajipan-kewajipan jawatan Yang Dipertua, Majlis Daerah Pekan dengan sah di sisi undang-undang termasuklah Timbalan Yang Dipertua.

(2) Dalam undang-undang kecil ini, sebutan mengenai orang yang mempamerkan sesuatu iklan hendaklah ditafsirkan sebagai sebutan mengenai orang yang sendirinya atau melalui penjawat atau ejennya, mempamerkan atau mengarah supaya dipamerkan iklan itu dan hendaklah disifatkan sebagai termasuk-

(a) pemunya atau penduduk tanah di mana iklan itu dipamerkan:

(b) mana-mana orang, firma perbadanan atau pertubuhan yang mengenai barang-barang, tred, perniagaan, profesion, peristiwa atau lain-lain urusannya, publisiti diberikan dengan iklan itu.

3. Bahasa iklan.

(1) Bahasa Malaysia hendaklah digunakan bagi semua iklan sama ada ianya sahaja atau bersama dengan apa-apa bahasa lain.

(2) Jika Bahasa Malaysia digunakan bersama dengan apa-apa bahasa lain dalam sesuatu iklan, perkataan-perkataan dalam Bahasa Malaysia itu hendaklah berukuran lebih besar dan ditunjukkan dengan lebih jelas dari segi keutamaan visual dan kedudukan daripada perkataan-perkataan dalam mana-mana bahasa lain dan penggunaan Bahasa Malaysia hendaklah dengan nahu yang betul.

(3) Tiada seorang pun boleh mempamerkan atau menyebabkan atau membenarkan dipamerkan mana-mana iklan yang tidak mematuhi perenggan (1) dan (2).

(4) Walau apa pun peruntukan perenggan (3), jika nama sesuatu firma, syarikat atau persatuan sebagaimana yang didaftarkan di bawah Akta Pendaftaran Perniagaan 1956 [Akta 197], Akta Syarikat 1965 [Akta 125] atau Akta Pertubuhan 1966 [Akta 335], terdiri dari atau termasuk perkataan yang bukan

dalam Bahasa Malaysia, adalah tidak perlu untuk menterjemahkan perkataan-perkataan itu ke dalam Bahasa Malaysia:

Dengan syarat mana-mana orang yang mempamerkan iklan berlesen hendaklah menyatakan jenis aktiviti di dalam Bahasa Malaysia selaras dengan keperluan perenggan (1) dan (2).

(5) Jika ternyata kepada pegawai pelesen bahawa terdapat penggunaan Bahasa Malaysia yang tidak betul dalam mana-mana iklan, pegawai pelesen boleh melalui notis secara bertulis memerintahkan orang yang mempamerkan iklan itu, atau yang telah menyebabkan atau membenarkan iklan itu dipamerkan, mengubah iklan itu untuk membetulkan kesalahan itu mengikut apa-apa cara dan dalam sesuatu tempoh sebagaimana dinyatakan oleh pegawai pelesen dalam notis itu.

4. Penggunaan perkataan “Halal”.

(1) Tiada seorang pun boleh menggunakan perkataan-perkataan “Halal”, “Ditanggung Halal” atau lain-lain perkataan yang menunjukkan bahawa sesuatu makanan yang dimaksudkan oleh iklan itu adalah diproses, dimasak atau dibuat dengan cara yang diluluskan oleh agama Islam atau bahawa makanan itu tidak mengandungi apa-apa benda yang ditegah bagi seseorang Islam melainkan orang itu mendapat kebenaran bertulis daripada pegawai pelesen.

(2) Sebelum memberi kelulusan di bawah perenggan (1) pegawai pelesen boleh menghendaki bukti dengan memuaskannya bahawa makanan itu tidak ditegah di bawah agama Islam untuk dimakan oleh orang-orang Islam.

5. Perlesenan iklan-iklan.

Tertakluk kepada undang-undang kecil 18, tiada seorang pun boleh mempamerkan atau menyebabkan dipamerkan apa-apa iklan tanpa suatu lesen yang dikeluarkan oleh pegawai pelesen.

6. Permohonan bagi mendapatkan lesen.

(1) Sesuatu permohonan bagi mendapatkan lesen atau membaharui lesen untuk mempamerkan iklan hendaklah dibuat secara bertulis kepada pegawai pelesen dalam borang yang ditetapkan oleh pegawai pelesen dan hendaklah disertakan dengan:

(a) dua salinan lakaran yang menunjukkan butir-butir lengkap iklan itu;

(b) pelan tapak atau pelan tempat mengikut sekali 1 : 750 yang menunjukkan kedudukan iklan itu;

(c) pelan struktur yang hendak didirikan bagi maksud mempamerkan iklan itu bersama dengan perakuan seorang arkitek berdaftar atau jurutera struktur berdaftar yang memperakukan bahawa struktur itu akan berada dalam keadaan tegap dan kukuh selama tempoh iklan itu dijangka hendak dipamerkan; dan

(d) fi lesen seperti yang dinyatakan di dalam Jadual.

(2) Jika sesuatu iklan hendak dilekatkan kepada bangunan, pegawai pelesen boleh sebagai tambahan kepada kehendak-kehendak di bawah perenggan (1), menghendaki pemohon mengemukakan suatu taksiran bertulis oleh seorang jurutera awam atau jurutera struktur berdaftar mengenai kekukuhan struktur bangunan itu atau bahagian bangunan di mana iklan itu hendak dilekatkan.

(3) Pegawai pelesen boleh menghendaki seseorang pemohon mendeposit dengannya sejumlah wang yang jumlahnya sama dengan bayaran fi lesen yang ditetapkan bagi lesen tersebut.

7. Pengeluaran lesen.

(1) Apabila menerima permohonan, pegawai pelesen boleh apabila dibayar fi lesen dan apa-apa deposit yang dikehendaki mengeluarkan kepada pemohon sesuatu lesen untuk mempamerkan iklan.

(2) Tiap-tiap lesen yang dikeluarkan di bawah undang-undang kecil ini hendaklah di dalam bentuk yang ditetapkan oleh pegawai pelesen.

(3) Pegawai pelesen boleh mengenakan pada mana-mana lesen yang dikeluarkan di bawah perenggan (1) apa-apa terma dan syarat yang difikirkan patut dikenakan.

(4) Pemegang lesen hendaklah mematuhi terma-terma dan syarat-syarat yang dikenakan pada lesen.

8. Pembaharuan lesen.

(1) Sesuatu lesen boleh daripada semasa ke semasa diperbaharui atas pembayaran fi lesen.

(2) Sesuatu permohonan bagi memperbaharui lesen hendaklah dikemukakan sebelum tarikh tamatnya lesen itu dan hendaklah disertakan dengan fi lesen.

9. Fi lesen.

Fi lesen yang kena dibayar bagi jenis iklan yang dinyatakan dalam ruangan pertama. Jadual hendaklah dihitung mengikut kiraan bulanan dan mengikut kadar yang ditetapkan dalam ruangan kedua Jadual tersebut.

10. Fi lesen hendaklah dibayar balik jika lesen tidak dikeluarkan

(1) Pegawai pelesen boleh enggan mengeluarkan atau memperbaharui sesuatu lesen tanpa memberi apa-apa sebab baginya.

(2) Jika pegawai pelesen enggan mengeluarkan atau memperbaharui sesuatu lesen, fi lesen yang telah dibayar hendaklah dikembalikan sepenuhnya kepada pemohon.

(3) Jika pemohon menarik balik permohonannya sebelum ia ditimbang oleh pegawai pelesen, maka pegawai pelesen boleh melucutkan setengah fi lesen yang dikemukakan bersama dengan permohonan itu dan bakinya akan dikembalikan kepada pemohon.

11. Pembatalan lesen.

(1) Pegawai pelesen boleh tanpa memberi apa-apa sebab baginya, membatalkan sesuatu lesen:

Dengan syarat bahawa sebelum membatalkan lesen itu pegawai pelesen hendaklah memberi satu bulan notis secara bertulis akan cadangannya hendaklah berbuat demikian kepada pemegang lesen.

(2) Jika sesuatu lesen dibatalkan orang yang mempamerkan iklan itu hendaklah menurunkan iklan yang berkaitan dengan lesen itu dalam tempoh empat belas hari daripada tarikh pembatalan lesen itu.

(3) Jika sesuatu lesen dibatalkan, kerana melanggar mana-mana peruntukan undang-undang kecil ini, bayaran bagi tempoh yang belum tamat yang sepatutnya lesen itu boleh digunakan jika tidak disebabkan oleh pembatalan, tidak akan dikembalikan dan sebarang gantirugi tidak akan dibayar bagi pembatalan itu.

(4) Jika Sesuatu lesen dibatalkan kerana sesuatu sebab lain selain dari sebab melanggar mana-mana peruntukan undang-undang kecil ini, pegawai pelesen akan mengembalikan kepada pemegang lesen tersebut sebahagian daripada bayaran fi lesen berkadaran dengan tempoh lesen yang belum tamat yang sepatutnya lesen itu boleh digunakan jika tidak disebabkan oleh pembatalan tetapi sebarang gantirugi tidak akan dibayar bagi pembatalan tersebut.

12. Pembayaran balik deposit.

Tertakluk kepada undang-undang kecil 18(1), deposit di bawah undang-undang kecil 6(3) hendaklah dibayar balik kepada orang yang mempamerkan iklan itu selepas habis tempoh atau pembatalan lesennye dan iklan itu diturunkan.

13. Kawasan-kawasan untuk iklan.

Sesuatu iklan yang dilesen di bawah undang-undang kecil ini hendaklah dipamerkan hanya dalam kawasan yang diluluskan oleh pegawai pelesen sahaja.

14. Pengecualian daripada lesen.

(1) Tiada lesen dikehendaki lagi-

(a) sesuatu iklan yang luasnya melebihi 1 meter persegi yang mengiklankan penjualan atau penyewaan tanah atau rumah jika iklan itu dipamerkan di atas tanah harta yang hendak dijual:

Dengan syarat bahawa tidak lebih daripada satu iklan penjualan atau penyewaan itu boleh dipamerkan mengenai mana-mana satu harta:

(b) sesuatu papan tanda kontraktor bangunan atau kejuruteraan awam yang luasnya tidak melebihi 3 meter persegi jika papan tanda itu didirikan di atas harta di mana apa-apa kerja bangunan atau kejuruteraan awam sedang dijalankan:

Dengan syarat bahawa tidak lebih daripada satu papan tanda itu boleh dipamerkan mengenai mana-mana satu projek:

(c) sesuatu papan tanda kontraktor kecil yang luasnya tidak melebihi dua meter persegi yang didirikan berhubungan dengan sesuatu projek bangunan atau kejuruteraan awam:

Dengan syarat bahawa hanya satu papan tanda sahaja boleh dipamerkan mengenai mana-mana satu projek dan papan tanda itu tidak boleh mengandungi apa-apa perkara bergambar:

(d) satu tanda arahan berukuran tidak melebihi 0.3 meter persegi mengandungi nama orang atau firma, perbadanan atau pertubuhan yang didirikan di atas sesuatu tapakbina yang diluluskan oleh pegawai pelesen.

(2) Walaupun tiada sesuatu lesen dikehendaki bagi sesuatu iklan di bawah undang-undang kecil ini, iklan itu hendaklah dipamerkan mengikut undang-undang kecil 3, 15 dan 16.

15. Ketinggian dan unjuran iklan dsb.

(1) Jika mana-mana bangunan mempunyai sempadan yang sama dengan mana-mana jalan-

(a) sebarang iklan yang berukuran antara ketinggian 5 meter tetapi tidak kurang dari 2.75 meter, diukur menegak dari paras jalan, tidak boleh mempunyai unjuran melebihi 600 milimeter ke atas jalan tersebut;

(b) sebarang iklan yang berukuran melebihi 5 meter, yang diukur menegak dari paras jalan, tidak boleh mempunyai unjuran yang melebihi 1200 milimeter ke atas jalan tersebut,

bagi kedua-dua (a) dan (b) di atas sebarang unjuran yang dirujuknya itu, mestilah diukur dari garis biasa jalan itu.

(2) Dalam keadaan lain, tiada sebarang iklan boleh didirikan dalam garisan bangunan sebarang premis kecuali jika dibenarkan secara bertulis oleh pegawai lesen.

(3) Tiada iklan yang tingginya adalah melebihi 5 meter diukur tegak dari lorong jalan boleh menganjur keluar lebih daripada 0.6 meter melebihi garisan sempadan jalan.

16. Keselamatan struktur iklan.

(1) Apa-apa struktur, bersama dengan apa-apa lekapan pada sesuatu bangunan atau sebahagian daripada sesuatu bangunan, yang didirikan bagi maksud mempamerkan sesuatu iklan hendaklah diperakui sebagai kukuh dari segi struktur oleh seorang jurutera awam atau jurutera berdaftar selama tempoh lesen itu dalam borang yang ditetapkan oleh pegawai pelesen dan jika dikehendaki oleh pegawai pelesen, perakuan itu hendaklah termasuk kestabilan struktur bangunan atau sebahagian bangunan yang menyokong iklan itu.

(2) Apa-apa pelan yang dikemukakan di bawah undang-undang kecil ini hendaklah mematuhi keperluan Undang-Undang Kecil Bangunan Seragam yang sedang berkuatkuasa.

(3) Pegawai pelesen boleh dalam sesuatu kes tertentu mengecualikan pemohon daripada kehendak perenggan (1).

17. Penyenggaraan.

(1) Pegawai pelesen boleh melalui notis bertulis memerintahkan orang yang mempamerkan mana-mana iklan yang berlesen untuk mengecat semula, mengganti, membaiki atau membersihkan iklan itu dalam sesuatu tempoh sebagaimana yang dinyatakan di dalam notis itu.

(2) Jika warna mana-mana iklan bercahaya yang berlesen yang berkemungkinan menyebabkan kekeliruan atau gangguan kepada orang awam apabila iklan itu bercahaya, pegawai berlesen boleh melalui notis bertulis memerintahkan orang yang mempamerkan iklan itu menukarkan warna-warna dalam sesuatu tempoh sebagaimana yang dinyatakan dalam notis itu dan pemegang lesen hendaklah mematuhi notis itu.

18. Menurut iklan.

(1) Pegawai pelesen boleh memerintahkan supaya diturunkan serta merta apa-apa iklan, termasuk apa-apa struktur yang didirikan khas untuk iklan itu, yang dipamerkan tanpa lesen atau yang melanggar mana-mana peruntukan undang-undang kecil ini.

(2) Pegawai pelesen atau mana-mana pegawainya yang diberi kuasa boleh memasuki mana-mana premis pada bila masa yang berpatutan dan melaksanakan penurunan mana-mana iklan tersebut jika perintah penurunan tidak dipatuhi.

(3) Segala perbelanjaan bagi menurunkan iklan itu di bawah perenggan (2) hendaklah ditanggung oleh yang mempamerkan iklan itu dan pegawai pelesen boleh memotong perbelanjaan tersebut daripada mana-mana wang yang kena dibayar di bawah undang-undang kecil 12 dan 10(3).

(4) Pegawai pelesen boleh bagi maksud membaiki, mengecat semula atau membersihkan mana-mana tiang poster, memerintahkan supaya dipindahkan apa-apa poster dan walaupun mungkin ada apa-apa tempoh bagi lesen yang belum tamat, tiada apa-apa amaun fee lesen boleh dibayar balik kepada pemegang lesen.

19. Penalti.

Mana-mana orang yang melanggar, atau tidak mematuhi mana-mana peruntukan undang-undang kecil ini atau mana-mana syarat lesen atau apa-apa notis atau perintah pegawai pelesen, adalah melakukan sesuatu kesalahan dan apabila disabitkan boleh didenda tidak melebihi dua ribu ringgit atau dipenjarakan selama tempoh tidak melebihi satu tahun atau kedua-duanya dan denda tambahan tidak lebih daripada dua ratus ringgit bagi tiap-tiap hari kesalahan itu berterusan selepas disabitkan.

20. Anggapan.

Dalam mana-mana pendakwaan bagi sesuatu kesalahan di bawah undang-undang kecil ini, ianya hendaklah dianggap sehingga dibuktikan sebaliknya bahawa-

(a) mana-mana iklan yang dipamerkan di atas atau di dalam mana-mana premis telah dipamerkan oleh atau dengan kebenaran pemunya atau penduduk premis itu;

(b) mana-mana iklan mengenai sesuatu keluaran telah dipamerkan sedemikian oleh pembuat atau pengilang keluaran itu atau mengenai sesuatu barang-barang yang diimport, oleh ejen tunggal atau pengedarnya;

(c) mana-mana iklan mengenai apa-apa peristiwa telah dipamerkan oleh penganjur peristiwa atau jika penganjur peristiwa itu tidak diketahui oleh orang yang kepadanya hasil jualan tiket bagi peristiwa itu akan dibayar atau oleh orang yang akan mendapat keuntungan dari iklan itu.

21. Pemohon-pemohon lesen bertanggungjawab atas kegagalan.

(1) Tanggungjawab terhadap keruntuhan atau kegagalan sesuatu struktur atau lekapan yang berhubung dengan pertunjukan iklan sama ada semasa ia dibina atau selepas ia siap, hendaklah "prima facie" terletak ke atas orang atau orang-orang yang telah mengemukakan permohonan untuk lesen itu.

(2) Walaupun sesuatu iklan telah diluluskan oleh pegawai pelesen atau walaupun pegawai pelesen telah mengecualikan pemohon itu daripada undang-undang kecil 15(1), pegawai pelesen tidaklah bertanggungjawab terhadap apa-apa kerosakan yang berlaku kepada mana-mana orang oleh keruntuhan atau kegagalan struktur atau lekapan untuk iklan itu.

22. Kerosakan.

Pegawai pelesen tidaklah bertanggungjawab terhadap apa-apa kerosakan yang disebabkan olehnya atau penjawat-penjawatnya dalam menjalankan peruntukan-peruntukan undang-undang kecil ini.

23. Pengecualian.

Pegawai pelesen dengan bersyarat atau tanpa syarat, boleh mengecualikan mana-mana orang yang difikirkan patut daripada mana-mana peruntukan-peruntukan undang-undang kecil ini.

24. Kompaun.

(1) Sebarang kesalahan yang dilakukan di bawah undang-undang kecil 3, 4, 5, 7, 13, 14, 15, 16, 17 dan 18 boleh dikompaun oleh Majlis.

(2) Yang Dipertua, Setiausaha, Pegawai Undang-undang, Pembantu Undang-undang dan Pegawai Pendakwa boleh mengkompaun sebarang kesalahan tersebut.

(3) Jumlah wang yang akan dikutip oleh Majlis bagi mengkompaun sebarang kesalahan tersebut tidak boleh melebihi dua ratus lima puluh ringgit.

(4) Tawaran untuk mengkompaun sebarang kesalahan tersebut dan penerimaan tawaran akan dibuat dengan borang yang ditentukan oleh Majlis.

JADUAL

(Undang-Undang Kecil 6 dan 9)

FI LESEN

<i>Ruang Pertama</i> <i>Jenis Iklan</i>	<i>Ruang Kedua</i> <i>Fee yang kena dibayar</i>
1. Iklan tidak bercahaya:	
(a) Bagi keluasan tidak melebihi 8 meter persegi	RM 90.00 setahun
(b) Bagi tiap-tiap 1 meter persegi atau sebahagian daripadanya yang lebih daripada 8 meter persegi diukur meliputi keluasan untuk mempamerkan iklan	RM 9.00 setahun
2. Iklan bercahaya:	
(a) Bagi keluasan tidak melebihi 8 meter persegi	RM 60.00 setahun
(b) Bagi tiap-tiap 1 meter persegi atau sebahagian daripadanya yang melebihi 8 meter persegi diukur meliputi keluasan untuk mempamerkan iklan	RM 6.00 setahun
3. Jika sangga permukaannya lebih daripada ruangan yang digunakan untuk mempamerkan iklan, bagi tiap-tiap 1 meter persegi yang lebih dari ruangan itu	RM 5.00 setahun
4. Iklan kecil : iklan yang saiznya tidak melebihi 1 meter persegi dan bertujuan untuk dipamerkan lebih daripada satu iklan dari rekabentuk yang sama:	
(a) Bagi 100 iklan yang pertama dan sebahagian daripadanya	RM 10.00 setiap satu tahun
(b) Bagi tiap-tiap tambahan 100 iklan atau sebahagian daripadanya	RM 8.00 setiap satu tahun
5. Iklan kecil: Iklan yang saiznya tidak melebihi 0.5 meter persegi dan bertujuan untuk dipamerkan lebih daripada satu dari rekabentuk yang sama:	
(a) Bagi 100 iklan yang pertama atau sebahagian daripadanya	RM 3.00 setiap satu tahun
(b) Bagi tiap-tiap tambahan 100 iklan atau sebahagian daripadanya	RM 2.00 setiap satu tahun
6. Iklan di atas papan mengunjur keluar lebih daripada 15 sentimeter dari bangunan, keluasan yang hendak diukur meliputi seluruh luas papan tanda itu termasuk bingkai dan jika dipamerkan di kedua belah papan itu, tiap-tiap satu muka iklan itu hendaklah diukur:	

(a) Tidak bercahaya- keluasan yang tidak lebih daripada 2 meter persegi bagi satu tanda	RM 24.00 setahun
(b) Tidak bercahaya- bagi tiap-tiap 1 meter persegi atau sebahagian daripadanya yang lebih daripada 2 meter persegi	RM 15.00 setahun
(c) Bercahaya- bagi 1 meter persegi atau sebahagian daripadanya	RM 12.00 setahun
7. Iklan dalam bentuk huruf atau huruf-huruf yang dipamerkan pada mana-mana dinding, tembok atau bumbung tanpa sebarang bingkai hendaklah diukur dengan menambah ukuran sekeliling huruf atau huruf-huruf tersebut mengikut tinggi sebenar huruf yang digunakan:	
Iklan tidak bercahaya-	
(a) Bagi saiz yang tidak melebihi 8 meter persegi	RM 90.00 setahun
(b) Bagi tiap-tiap 1 meter persegi atau sebahagian daripadanya yang melebihi 8 meter persegi	RM 9.00 setahun
Iklan bercahaya-	
(a) Bagi saiz yang tidak melebihi 8 meter persegi	RM 60.00 setahun
(b) Bagi tiap-tiap 1 meter persegi atau sebahagian daripadanya yang melebihi 8 meter persegi	RM 6.00 setahun
8. Lesen untuk tanda langit diukur meliputi keluasan ruangan yang digunakan untuk mempamerkan tanda langit bagi tiap-tiap 1 meter persegi	RM 15.00 setahun
9. Jika sokong permukaan lebih daripada ruangan yang digunakan untuk mempamerkan iklan bagi tiap-tiap 1 meter persegi atau sebahagian daripadanya yang lebih daripada ruangan itu	RM 8.00 setahun
10. Poster yang dipamerkan di atas tiang poster bagi 1 meter persegi	RM 5.00 setahun
11. Sepanduk:	
(a) Bagi saiz tidak melebihi 8 meter persegi	RM 20.00 setahun
(b) Bagi saiz yang melebihi 8 meter persegi	RM 60.00 setahun

Diperbuat 7 Oktober 1994.

ABDUL MALEK B. HAJI ABDUL MAJID,
Yang Dipertua,
Majlis Daerah Pekan

Disahkan 24 Mei 1995.
[SUK. Phg. (KT) 5602 SJ. 2.]

MOHD NOOR B. ABDUL RANI,
Setiausaha,
Majlis Mesyuarat Kerajaan,
Pahang